

四庫全書

子部

欽定四庫全書

子部

藝林彙考棟宇篇卷二

詳校官中書臣王鵬

員外郎臣牛稔文覆勘

總校官編修臣王燕緒

校對官中書臣高中

謄錄監生臣畢所當

欽定四庫全書

子部十

藝林彙考

雜家類二 雜考之屬

提要

臣等謹案藝林彙考四十卷

國朝沈自南撰自南字留侯吳江人順治壬辰進士官山東蓬萊縣知縣是書凡五篇曰棟宇曰服飾曰飲食曰稱號曰植物前有秀水陳鑑題記云此書凡二十四篇卷帙甚多當

時所刻止此然切于人事者畧備矣棟宇篇  
子目凡十曰宮殿府署亭臺門屏廟室寺觀  
宅舍廡序梁欂溝塗服飾篇子目凡八曰冠  
幘簪髻裝飾袍衫佩帶視袴履舄繒帛飲食  
篇子目凡六曰饗膳羹豉粉餽包膾酒醴茶  
茗稱號篇子目凡十一曰宮掖宗黨戚屬尊  
長朋從卒伍編戶僕妾巫優諱名道釋植物  
篇一卷無子目所載僅瓊花一類棟宇服飾

飲食稱號四篇皆有自南題辭而植物一篇  
獨無之蓋尚非完帙也其所徵引率博瞻有  
根柢故陳鑑題記又述汪份之言曰彙考所  
載諸書皆取有辨正者閱之足以益智祛疑  
又所采必載書名令習其書者可一望而知  
欲觀原文者亦可按籍以求其體例皆非近  
世類書所能及所論頗得其實故特錄之雜  
考類中不與他類書並列焉乾隆四十六年

五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

藝林彙考總目

棟宇篇 十卷

服飾篇 十卷

飲食篇 七卷

稱號篇 十二卷

植物篇 一卷

此書凡二十四篇卷帙甚多當時所刻止此然

切於人事者畧備矣余嘗聞過喜汪先生云景  
考所采書皆取有辨證者閱之足以益智祛疑  
又所采必載書名令習其書者可一望而知欲  
觀原文者亦可按籍以求其體例皆非近世類  
書所能及宜立齋健菴先後稱美也時匠門秀  
野諸先生屢購此書而以版壞缺難印行卒不  
能致今復得刊修行世有深幸焉故謹述所聞  
以告學者乾隆辛未八月朔秀水後學陳鑑



藝林彙考棟宇篇題記

不曰宮室而曰棟宇何也名不足以該也凡廊廡廬舍  
第宅之形其成者以言宮室可也至棖櫨題楣節枋之  
物其材者以言宮室不可也易曰聖人易之以宮室上  
棟下宇以待風雨言宮室而復言棟宇蓋窮上極下以  
該之也故言棟而凡物之材焉者舉之言宇而凡形之  
成焉者備之是取以名斯篇

卷之一

宮殿類

卷之二

府署類

卷之三

亭臺類

卷之四

門屏類

卷之五

廟室類

卷之六

寺觀類

卷之七

宅舍類

卷之八

廡序類

卷之九

梁欐類

卷之十

溝塗類

藝林彙考服飾篇題記

昔漢高初得天下即用叔孫通定禮儀再易世至文帝  
冠裳極矣而賈生首以易服色為言設生當公子王孫  
相告時不知其能不從國人風靡否也抑愚又有疑焉  
吾夫子不曰從周則曰從衆而朱晦翁曰滎陽承藝祖  
遺制乃於休致日獨變服深衣方領圓袂雖裁製縫袷  
動合乎禮法然律以從周從衆之旨則違古復古均足  
譏矣學者第當求詳其說耳置之勿論勿議可也歷代

服章其損益沿革具存通典通志諸書茲取有裨文藝  
足徵作家紕繆者雜采成篇夫鄭氏大儒猶誤註繫屬  
為悅曩誰謂見聞取證不在裙襜間哉故以服飾考證  
為藝林之一篇其卷類具之如左

卷之一

冠幘類上

卷之二

冠幘類下

卷之三

簪髻類

卷之四

裝飾類

卷之五

袍衫類

卷之六

佩帶類

欽定四庫全書

目錄

卷之七

棍袴類

卷之八

履舄類上

卷之九

履舄類下

卷之十

繒帛類



藝林彙考飲食篇題記

飲食之人則人賤之此為不究心於飲食者言也不究心於飲食而營營焉以飲食為事雖終日飲食而謂之不知飲食可也故曰人莫不飲食也鮮能知味也夫鹽苦辛酸入口易辨調和烹飪拙婦所能而君子曰鮮能則夫飲之食之當有在乎飲食之外矣今餽飭具備而或不能舉其名即粟菽日陳而或不得詳其義適於少者而或戾於朝宜於左者而或違於右則一舉七間而

昧昧於名物格格於義類者多矣奚必登鍊珍之堂以稱奇讀膳夫之錄而不識哉為輯飲食篇

卷之一

饗膳類

卷之二

羹醢類

卷之三

粉餠類

卷之四

魚膾類

卷之五

酒醴類上

卷之六

酒醴類下

卷之七

茶茗類



藝林彙考稱號篇題記

古人於名謂之際每嚴為討論而今於所習呼習聞者  
試一問之茫然有不可解者況乎言有尊卑名多褒刺  
或彼此而互異或今昔所殊稱俗習沿流方言別謬豈  
無定論不加詳究則矢之口而多誤行之文而無當其  
以取誚倫輩寧第撐犁孤塗之誤已哉然爾雅廣疏或  
備矣而不詳風俗諸通或詳矣而不盡此稱號篇之所  
為輯也一稱號所由來者宜考如東道之主與西方之

聖是也一稱號之疑似者宜考如把之為伯中之為仲是也一稱號之印證者宜考如背私為公有制為卿之類是也一稱號之無謂而有說者宜考如所欽之為兄弟彙礪鄉里之為夫與妻是也一稱號之素謬者宜考如丘嫂之丘慈母之慈是也一稱號之相通者宜考如大人之可以母先子之可以祖是也至如小生儋父則鄙巷之衰彈必求中的而龍戶馬人則詩章之似是詳列多方凡宮掖家庭市陌里巷自帝王師長以至俳優

詆誚之談靡不出入章句詳搜採綴真使不疑者從此  
致疑無據者因而有據矣往時有為文壽其世母者而  
謂之媼為士林所笑是篇可以證矣

卷之一

宮掖類

卷之二

宗黨類

卷之三

戚屬類

卷之四

尊長類

卷之五

朋從類

卷之六

卒伍類

卷之七



編戶類

卷之八

僕妾類

卷之九

巫優類

卷之十

諱名類上

卷之十一

譚名類下

卷之十二

道釋類

藝林彙考引

昔沈約任昉梁號通儒猶事咨劉杳王儉何憲齊稱博  
學每言屈陸澄豈閱鉅無聞抑綜核匪易故連篇雕績  
未謂通才而隻字齟齬便傷大雅彼讀書不求解知是  
寓言至留誤以待思斯惟達者豈謂文章小道能畧訓  
詁迂詞諱求銀管之絲致改金根之繆一言獲戾九悔  
靡追恒于流覽之餘每甚疎庸之懼在昔作家若麟州  
夢溪漁隱野客之條貫今茲哲匠則儼山升菴弁州元

瑞之淹通其他名世鉅儒數難更僕至於稗官雜說多足汗牛若辨析精詳累章可錄或發明疑似片語足資第其旨散殊惜未經條貫爰收散帙彙輯成篇輒析諸家分從類列存為典故庶幾端臨漁仲之功臣核其罔誣寔堪成式子年之惡石第有事乎蒐羅未敢參以評騰將防罣漏寧嫌詮次之愚求便觀瞻不厭標題之易所恨見聞孤陋未嘗夙究三蒼徒幸歲月優閒聊以窮茲五技仰希博雅用誨愚蒙沈自南述

欽定四庫全書

藝林彙考棟宇篇卷一

蓬萊縣知縣沈自南撰

宮殿類

蘇氏演義殿共也取衆屋擁從如軍之殿

初學記案叙昔堯有貳宮

帝王世紀曰堯  
見舜處于貳宮

撫宮

見相  
兒宮

湯

有鑣宮

見墨子湯所  
受命之宮

周有蒿宮

見大  
戴禮

鄭宮春宮

見紀年  
穆王所

居秦有斬年宮信宮梁山宮

見史記並  
始皇所居

漢有沛宮甘泉

宮龍泉宮太一宮思子宮後漢有南宮北宮胡桃宮

見東

觀漢記

魏有鄴宮

見魏略

吳有太初宮昭明宮

見吳志

此諸宮

皆範金合土而為之以為貴也

見禮記

亦猶天文之有紫

宮文昌及五宮

見史記天官書

神僊之有金玉琉璃宮矣

見十洲記

然自古宮室一也漢來尊者以為常號下乃避之也

見風

通俗

初學記案叙蒼頡篇曰殿大堂也商周以前其名不載

案史記秦始皇始作前殿漢書則有甘泉函德白虎金

華諸殿漢宮又有大夏長秋朱鳥玉堂銅馬諸殿後漢

書有溫明

在邯鄲

陽安華光諸殿洛陽宮殿簿有魏太極

九龍芙蓉九華承光諸殿漢晉春秋有景福

在許昌

聽政

在諸殿晉宮閣名有靈圃百子虞泉清冥諸殿歷代殿

名或沿或革惟魏之太極自晉以降正殿皆名之

蟲魚考嚴助相貝經曰堯懸貝轂于塢宮貝轂以貝飾

轂也塢宮他書亦未見

雋言地理志堯作游成陽師古曰作游者言為宮室游

止之處也

說原殿大堂也秦始皇始作前殿宸帝居也楓宸言植此木于宸中也殿堂象東井形刺水藻等物所以厭火也

丹鉛錄狶韋氏之圃黃帝之圃有虞氏之宮湯武之室呂惠卿曰圃而圃宮而室言世益衰居益狹矣

類函白虎通曰黃帝作宮室以避寒濕世本曰禹作宮室二說不同



天中記釋名曰宮穹也言屋見于垣上穹崇然也郭璞云宮謂圍繞之記曰君為廬宮之是也爾雅云宮謂之室室謂之宮詩云作于楚宮又曰入此室處是也風俗通曰宮室一也秦漢以來尊者以為常號下乃避之也呂覽云武王克殷靖箕子之宮環堵之室又曰季武子入宮不敢哭是士庶人皆有宮稱也

梁谿漫志古者居室貴賤皆通稱宮初未分別秦漢以來始以天子所居為宮矣禮記云父子異宮又云儒有

一畝之宮環堵之室林子中在京口作詩寄東坡云欲  
喚無家一房客五雲樓殿鎖鰲宮而東坡和云叩頭莫  
喚無家客歸掃峨眉一畝宮蓋本諸此

古今攷尚書五刑有服注五刑墨劓剕宮大辟穆王作  
呂刑宮罰之屬三百漢刑法志宮罪五百小顏引書孔  
傳注宮淫刑也男子割勢婦人幽閉又曰宮者使守內  
注人道既絕於事便也然則宮刑者以守內得名宮亦  
謂之內內亦謂之宮史記秦紀二世常居禁中蔡邕曰

禁中者門尹有禁非侍御者不得入故曰禁中王鳳父  
諱禁徵王莽改禁中曰省中後世稱宮禁諸葛表曰宮  
中府中然則宮府者內庭外庭之分曰大內曰南內曰  
北內曰東朝曰西朝一也然古者宮無稱禮記曰命士  
以上父子異宮儒有一畝之宮環堵之室士庶通謂之  
宮風俗通曰漢來尊者以為帝居下乃避之也釋名云  
宮穹也言屋見於垣上穹崇然也易曰上古穴居而埜  
處後世聖人易之以宮室上棟下宇以待風雨蓋取諸

大壯

石林燕語古者天子之居總言宮而不名其別名皆曰堂明堂是也故詩言自堂徂基而禮言天子之堂初未有稱殿者秦始皇紀言作阿房甘泉前殿蕭何傳言作未央前殿其名始見而阿房甘泉未央亦以宮名疑皆起于秦時然秦制獨天子稱陛下漢有魯靈光殿而司馬仲達稱曹操范曄稱竟陵王子良皆曰殿下則諸侯王漢以來皆通稱殿下矣至唐初制令惟皇太后皇后

百官上疏稱殿下至今循用之蓋自唐始也其制設吻者為殿無吻不為殿矣

野客叢書石林燕語秦始皇作阿房宮甘泉殿蕭何作未央殿其名始見僕觀黃帝有合宮堯有貳宮湯有鑪宮周有蒿宮楚有蘭臺宮韓有鴻臺宮齊有雪宮列子有化人宮神異經有天淫宮古之言宮者如此宋玉賦謂高殿以廣意商君為天子之殿戰國策謂蒼鷹擊於殿上說苑謂齊有飛鳥下止殿前莊子謂入殿門不趨

奉劍於殿下史記毛遂定從於殿上優孟入殿門古之言殿者又如此則知宮殿之稱其來久矣非但始於秦始皇也但殿未聞專名某殿而已此二字者上下通用不拘至尊如儒有一畝之宮象往入舜宮霍光第中鴟鳴殿前黃霸居丞相府舉孝子先上殿藝文類聚謂蕭何曹參韓信皆有殿

鶴山雅言漢宮殿之制宮是總名宮中各有殿漢初有未央長樂兩宮武帝以來有長楊五柞甘泉如未央宮

自有三十六殿又古元無殿字却借殿後的殿字如今人稱廳元無廳字却借聽字上從厂殊無義理

困學紀聞稿人注今司徒府中有百官朝會之殿後漢蔡邕集所載百官會府宮殿下者也古天子之堂未名曰殿說苑魏文侯御廩灾素服辟正殿五日莊子說劍云入殿門不趨蓋戰國始有是名燕禮注當東雷者人君為殿屋也疏謂漢時殿屋四向流水舉漢以況周然漢黃霸傳先上殿注謂丞相所坐屋古者屋之高嚴通

呼為殿不必宮中也

演繁露黃霸傳鷦雀飛集丞相府張敞奏霸集計吏使  
能言孝弟風化者上殿則是丞相府中有殿也許叔重  
曰殿堂也顏師古曰古者屋之高嚴通呼為殿不必宮  
中夫古今事物名稱隨世更易顏言未必無理然元后  
傳王根第中起土山立兩市殿上赤墀戶青瑣董賢傳  
將作大匠為賢起大第重殿洞門師古於此故曰殿有  
前後僭天子制也則不更以殿為高屋矣豈以殿之重



復者乃為天子禮邪不然何以語皆出顏而二傳異釋也鄭司農釋周禮朝士所掌外朝曰今司徒府有天子以下大會殿亦古之外朝也司農所見東都制也應劭曰丞相舊位在長安時府有四出門隨時聽事明帝時但為東西門耳國每有大議天子車駕親幸其殿殿西王侯以下更衣併存即周禮外朝也干寶注曰司徒府中有百官朝會殿天子與丞相決大事是外朝之存者由鄭應干三說合之人臣府第乃有殿焉則師古謂凡

高嚴之屋皆得稱殿似矣而三人同辭皆謂此殿以朝會為名而天子又嘗臨幸則恐司徒未必敢以聽事也若霸府殿正受計其上則是相府所得專有豈西都於此種等差未致其察也故魯雖諸侯王而靈光歸然亦不以僭制而毀削也且其得名為殿者以嘗受朝備臨幸則他公府不皆有而朝會臨幸亦止在司徒府邪按漢宮典儀司徒府與蒼龍闕對則亦不在禁中諸家謂古外朝在路門之外其地亦與古應也則是殿也雖立

於司徒府非司徒可得而有也

中華古今注宮謂之室室謂之宮皆所以通古今之語  
明同實而兩名之也

餘冬序錄古今注宮謂之室室謂之宮而朱子以宮為  
牆

名義考宮非寢室也牆也殿非正朝之室也亦猶堂也  
記君為廬宮之儒行注宮牆垣也蚯蚓依牆而生故名  
守宮不得其門而入者曰宮牆外望宮之為牆可知已

蒼頡篇殿大堂也虞摯云其制有經左城右平平以文  
輒相亞次城者為階級是殿與堂同但有大小耳即今  
所謂三墀者是也詩殿天子之邦馬融殿後軍義取此  
殿之為堂可知已古儒有一畝之宮漢黃霸令計吏條  
對有舉孝子先上殿宮殿又通上下言之秦以後始為  
至尊之稱師古曰屋之高嚴者通呼為殿周禮六宮注  
婦人稱寢曰宮則謂宮為寢室謂殿為正朝之室者亦  
有自來矣

城音戚輒  
與碑同

古今攷舜典羣后四朝注各會朝於方岳之下周禮朝  
覲會同宗遇于王春秋來朝禮記一不朝再不朝皆虛字  
也所謂朝見朝會朝謁之禮也周禮天官宰夫掌治朝  
之法注治朝在路門之外司士掌馮王入內朝皆退注  
王入路門內朝朝者皆退小司寇掌外朝之政注外朝  
在雉門之外天子有五門三朝五門者路門也應門也  
臯門也雉門也庫門也三朝者內朝也治朝也外朝也  
治朝與內朝而二皆稱內朝玉藻曰路寢聽政曰退適

小寢路寢大寢也正寢也此謂諸侯亦有三朝也路寢  
即治朝也小寢即燕寢也今之州治大廳正寢也小廳  
小寢也別府堂宅燕寢也與古微不同大小廳聽政治  
事之所也古卿大夫亦有內朝外朝猶大廳小廳也曰  
立朝曰造朝曰臨朝曰眎朝曰朝位曰朝廷皆實字也  
地名也辨此則可以論古今之朝禮朝位矣

丹鉛錄枌詣殿漢本樸楹殿蓋二木所構因以為名如  
長楊五柞之例枌詣文選假借字耳爾雅注引齊諺上

山作檀檟樞先彈二木與檀相似也

秋林伐山甘泉宮有三秦之甘泉宮在渭南隋之甘泉宮在鄠漢之甘泉宮在馮翊雲陽縣戰國策范雎說秦王曰大王之國北有甘泉谷口秦二世造甘泉宮雲陽記云谷口去雲陽宮八十里流潦沸騰飛泉灑激兩岸峭壁孤豎橫盤凜然凝沍每入穴中朱明盛暑當晝暫暄涼秋晚候緼袍不暖所謂寒門也漢世以為避暑之處劉歆甘泉宮賦云軼陵陰之地室過陽谷之秋城回

天門而鳳舉躡皇帝之明庭冠高山而為居垂崑崙而  
為宮梁劉孝威詩漢家迎夏畢避暑甘泉宮校尉烏桓  
騎待制樓煩弓後旌游五柞前笳度九峻才人豹尾內  
御酒屬車中輦回百子閣扇度七輪風鳴鍾休衛士披  
圖召後宮材官促校獵涼秋戲射熊

丹鉛錄漢武帝元鼎六年破南越建扶荔宮以荔枝得  
名也此荔駢生若十八娘之類曰扶荔者亦若扶竹扶  
桑云



因學紀聞中說前述云隋文帝坐太極殿召見因奏太平之策十有二焉按唐會要武德元年五月改隋太興殿為太極殿隋無此名

杜言相如上林賦云夷峻築堂累臺增成如淳云峻山也張揖云平此山以築堂也重累而成之故曰增成下句解不妥按爾雅丘一成曰敦丘再成曰陶丘三成曰崑崙丘累臺增成者累臺而增丘之成使其更高也漢有增成殿蓋亦取此義

困學紀聞漢袁良碑云帝御九龍殿引對飲宴集古錄  
跋謂九龍殿名惟見於此愚按張平子東京賦曰九龍  
之內寔曰嘉德注九龍本周時殿名門上有三銅柱柱  
有三龍相糾繞故曰九龍嘉德殿在九龍門內非但見  
于此碑也

天中記後漢書光武居邯鄲宮晝臥溫明殿耿弇入造  
牀下注云趙王如意之殿也故基在今洺州邯鄲縣內  
王伯厚玉海歷代殿名書此于六國趙下誤

金石錄漢西嶽華山廟碑略云孝武修封禪之禮巡省五嶽立宮其下宮曰集靈宮殿曰存仙殿門曰望仙門集古錄云集靈惟見此碑按地理志華陰有集靈宮武帝起水經注云敷水北逕集靈宮引地理志則不獨見於此碑矣所謂存仙殿望仙門者諸書不載按集靈存仙各見載記而二公之說若此

宛委餘編金陵覽古晉孝武太元三年僕射謝安作新宮太極殿欠一梁有梅木流至石頭城下取用之畫梅

花於梁上表瑞因名梅梁殿會稽志所載大禹廟梅梁生  
花今其木尚在

天中記晉中興書孝武帝造太極殿郭璞筮云二百十  
年此殿為奴所壞後梁武帝毀之捨身為奴按璞明帝  
時為王敦所殺已五十餘年書誤

宮詞注王建詩蓬萊正殿壓金鰲紅日初生碧海濤開  
著五門遙北望柘黃新帕御牀高唐書高宗紀制蓬萊  
宮殿等名長安志紫宸殿後有蓬萊殿雍錄高宗染風痺

惡太極宮卑下故就修大明宮改名蓬萊宮取殿後蓬  
萊池為名也咸亨元年改蓬萊宮為含元殿長安五年  
又改為大明宮殿北有池亦名蓬萊池今言金鰲者意  
有橋駕出于池上也唐大明宮圖蓬萊殿坐北面南前  
有宣政齊禮崇德含曜昭慶五門故曰開著五門遙北  
望云

宮詞註漢書戾太子傳夜入未央宮殿長秋門後漢書  
馬皇后傳奏立長秋宮注皇后所居宮也長者久也秋

者萬物成熟之初也隋書大長秋主諸宦者以司宮闈之職六典長秋秦官景帝更為大長秋或用中人或用士人劉禹錫詞日晚長秋簾外報

宮詞註王建詩未明開著九重關金畫黃龍五色旂直到銀臺排仗合聖人三殿對西番唐宮城圖朱明門在太極殿殿前中有嘉德門東有日精門左延明門通訓門恭禮門西有月華門右延明門通明門安仁門故謂之九重關雍錄三殿者麟德殿也一殿而有三面故名

三殿也三院即三殿也李絳為中書舍人嘗言為舍人  
踰月不得賜對有詔明日對三殿也凡蕃臣外夷來朝  
率多設宴于此至臣下亦多召對于此也長安志龍朔  
二年造宣政紫宸蓬萊三殿以此又名之三殿也演繁  
露唐有三殿則一殿而三面有殿也方鎮外國來朝則  
宴于此兩京新記大明宮有麟德殿三面玄宗與諸王  
近內臣宴多于此殿獻替記于三殿對學士會要于三  
殿對南詔皆其地也

演繁露國朝太皇太后時并皇太后皇后稱三殿其後  
乘輿行幸奉太后偕皇后以出亦曰三殿人或非之按  
王嘉傳云自貢獻宗廟猶不至此師古注謂天子太后  
皇后則三殿亦可通稱唐有三殿則一殿而三面有殿  
也方鎮外國來朝則宴于此從銀臺門入

埜客叢書杜子美詩曰不遠明光殿致於丹青地洙注  
曰明光殿霍去病借以避暑修可注曰漢殿名元后傳  
成都侯借以避暑是已東坡詩曰何人先入明光宮又



曰老死不入明光宮趙注皆曰武帝太初四年所起乃  
成都侯商所借以避暑者也僕嘗考之漢有兩明光宮  
一明光殿按三輔黃圖一明光宮屬北宮一明光宮屬  
甘泉宮屬北宮者正成都侯商避暑之所屬甘泉宮者  
乃武帝所造以求仙者所謂明光殿自在桂宮三者元  
不相干今觀諸家之注往往認為一處甚有以避暑事  
為去病用事甚疎鹵極可笑僕又考漢紀太初四年起  
明光宮師古注曰成都侯避暑借明光宮蓋謂此師古

之注已有此謬

雋言師古曰阿房者言殿之四阿皆為房也一說大陵  
曰阿言若于阿上為房也房字或作旁字說云始皇作  
此殿未有名以其去咸陽近故號阿房阿近也東方朔  
傳舉籍阿城以南阿城本秦阿房宮以其牆壁崇廣故  
俗呼為阿城

容齋五筆漢谷永對成帝問曰抑損椒房玉堂之盛寵  
顏師古注椒房皇后所居玉堂嬖幸之舍也按漢書李

尋傳久汙玉堂之署注玉堂殿在未央宮翼奉疏曰孝文帝時未央宮又無高門武臺麒麟鳳凰白虎玉堂金華之殿三輔黃圖曰未央宮有殿閣三十二椒房玉堂在其中漢宮閣記云未央宮有玉堂宣室閣又引漢書建章宮南有玉堂壁門三層臺高三十丈玉堂內殿十二門階階皆玉為之又有玉堂神明堂二十六殿然漢書郊祀志但云建章宮南有玉堂壁門而無他語晉灼注揚雄解嘲上玉堂之句曰黃圖有大玉堂殿小玉堂

殿而今黃圖無此文國朝太宗淳化中賜翰林玉堂之署四字其後以最下一字犯廟諱故元符中只云玉堂紹興末學士周麟之又乞高宗御書玉堂二字揭於直廬麟之跋語自有所疑已而議者皆謂玉堂乃殿名不得為臣下直舍當如承明故事請曰玉堂之廬可也今翰林但扁摘文堂三字示不敢居則其為禁內宮殿明白有殿有閣有臺谷永以配椒房言之意當日亦嘗為燕游之地師古直以為嬖幸之舍與前注自相舛異誤

矣

繼古叢編昔人論玉堂乃前漢殿名其後翰苑則名玉堂之署又其後避諱直曰玉堂是以殿名榜直廬矣余

攷玉堂之名不止漢殿也楚蘭臺之宮亦有玉堂

宋玉風賦

倘佯中庭  
北上玉堂

東漢文翁講授之室亦名玉堂天上神仙壁

記之地亦名玉堂名山仙人所居之地亦有玉堂至唐人梅詩有云白玉堂前一樹梅此白玉堂則如古樂府君家誠易知易知復難忘黃金為君門白玉為君堂堂

上罷尊酒使作邯鄲倡非翰苑之玉堂矣然則玉堂之名不始於漢不專於殿云

七修類稿三輔黃圖有大玉堂小玉堂殿谷永傳損抑椒房玉堂之盛寵注玉堂嬖幸之舍李尋傳曰久汙玉堂是知實嬖幸之處乃漢殿名故宋太宗飛白書玉堂之署四字蓋待詔者有直廬於殿側故曰署元豐中學士請摘上二字以名翰院故翰院亦名玉堂繼古襲編謾言翰院亦名玉堂之署無著落矣又曰後避諱直曰

玉堂尤非也

鼠璞應劭漢官儀曰皇后稱椒房取其實蔓盈升予攷之江充傳先治甘泉宮轉至未央椒房上官桀傳將軍有椒房中宮之重劉輔傳於是減省椒房掖廷用度及馬援以椒房不預雲臺之次椒房殿為后所居固分明師古注椒房謂以椒和泥塗取其溫而芳却有此理詩曰貽我握椒注椒芬香也男女相說交情好也其義恐出此離騷經云播芳椒兮成堂與石崇塗屋以椒不過

取其芬香於蔓衍盈升初無關涉成帝寵趙昭儀復建椒風殿以居之今例以椒風為皇后事非是

閱耕餘錄椒房之名起于漢蓋皇后所居以椒塗壁取繁衍之義亦以其溫而芳也哀帝時董賢得幸其女弟為昭儀更名其舍為椒風以配椒房晉書后妃傳又稱椒掖

雋言賓戲及時君之門闈究先聖之壺奧應劭曰宮中門謂之闈宮中巷謂之壺又壺闈恣趙



鼠璞今以太后為東朝蓋用叔孫通傳惠帝東朝長樂事然顏延年詩曰君彼東朝金昭玉粹東朝則太子朝也今以太子為東宮蓋用班彪傳東宮初建事然成帝報許后曰皇后其孝東宮毋闕朔望東宮則太后宮也此皆隨地以言初無定名後世以東朝為太后以東宮為太子可謂拘泥

鶴山雅言漢高帝以未央宮舍太上皇自居長樂宮故崩于長樂獨高帝一人自帝崩後吕后元居長樂而惠

帝居未央以此遂為母后宮名漢以未央為正衙未央  
視長樂居東故謂之東朝如王后立宣帝一月後太后  
還長樂宮始置屯衛是也漢惟有北闕東闕自北闕出  
入而南闕西闕無之至今只說天北闕

香宇詩談唐詩多用千門如鑾輿迥出千門柳歸鴻欲  
度千門雪却望千門草色閒蓋建章宮千門萬戶也故  
王安石亦云千門萬戶曈曈日

復齋漫錄前漢趙飛燕既立為皇后寵少衰而弟絕幸

為昭儀居昭陽蓋飛燕本傳云爾太白金宮詞云宮中誰  
第一飛燕在昭陽夫昭陽昭儀所居也非謂飛燕耳後  
見唐王叡松牕錄云禁中呼木芍藥為牡丹命李白為  
新詞有借問漢宮誰得似可憐飛燕倚新粧之句乃知  
昭陽之語世所傳者誤也

演繁露晉郗詵試東堂得第自言猶桂林一枝東堂者  
晉宮之正殿也山謙丹陽記曰前殿正殿也東西堂魏  
制也在周為小寢也

演繁露說文堦堂塾也

丁果反

又云塾門側堂也今堦殿

取此

決疑要注凡大殿乃有陛堂則有階無陛也左城右平  
平者以文磚相亞次城者為陛級也九錫之禮納陛以  
登謂受此陛以上殿堂之正者為路寢

容齋隨筆朱雲請斬馬劍斷張禹首攀殿檻折及後當  
治檻上曰勿易因而輯之以旌直臣至今宮殿正中一  
間橫檻獨不施欄楯謂之折檻蓋自漢以來相傳如此

矣

宮詞註王建詞上得青花龍尾道側身偷覷正南山按  
龍尾道在含元殿意此云殿前即含元也唐大明宮圖  
含元殿在宣政門外翔鸞閣在其東棲鳳閣在其西長  
安志龍朔二年造含元殿雍錄龍尾道者含元殿正南  
升殿之道也賈黃中談錄含元殿前龍尾道自平地凡  
詰曲七轉由丹鳳北望宛如龍尾下垂于地兩垠闌檻  
悉以青石為之至今石柱猶有存者兩京新記含元殿

左右有砌道盤上謂之龍尾道康駢劇談錄含元殿左右立棲鳳翔鸞二閣龍尾道出于閣前殿門去南門二里元會衆朝者仰觀玉座如在霄漢蓋含元殿南疏階升殿凡為三大層自下而上其下兩層皆培土鋪甃為陂陀斜道不疏小級其鋪甃處逶迤屈曲凡七轉自丹鳳北望則如龍行而垂其尾是以命為龍尾道也龍尾云者亦附竝龍首山為義而立名也比之龍尾者其培土處合為一階而階上所鋪甃道則分而為兩以引班

對上故仁裕曰階兩面龍尾道各六七十步也長安志  
大明宮北據高原南望興壇每天晴日朗南望終南山  
如指掌故云偷覷正南山者即終南山也漢故長安城  
圖南山與長信長樂光明諸宮講武崇文諸殿相對  
嘉話錄今延英殿紫芝殿也謂之小延英苗韓公居相  
位以足疾步驟微蹇上每於此待之宰相傳小延英自  
此始也

建康宮殿薄太初宮中有神龍殿去縣三里左太沖吳

都賦云抗神龍之華殿施榮楯而捷獵是也赤烏殿在縣東北五里吳昭明宮內制度上應星宿吳都賦云崇臨海之崔嵬飾赤烏之瞭眈是也

三餘帖唐太宗養一白鶻號曰將軍取鳥長驅至殿前然後擊殺故名落雁殿

演繁露壽陽公主在含章殿梅花飄著其額因撫倣之  
以為粧樣山謙之丹陽記曰皇后正殿曰顯陽東曰含  
章西曰徽音皆洛陽宮舊名也名起後漢



天中記舊唐書三陽宮武三思以則天厭居深宮又欲  
與張易之昌宗等扈從馳騁以弄其權乃請創造三陽  
宮于嵩高山興泰宮于萬壽山請則天每歲臨幸前後  
工役甚重百姓怨之又久視年則天幸三陽宮自夏涉  
秋不時還都張說上疏諫曰三陽宮去洛城一百六十  
里有伊水之隔崿坂之峻過夏涉秋水潦方積道壞山  
險不通轉運奈何去宗廟之上都安山谷之僻處是猶  
倒持劔戟示人鐃柄臣竊為陛下不取見說本傳按此

舊書本自明白新書乃為艱澁之詞云后造暑三陽宮  
故知震雷不暇掩聰也夫造暑三陽已不成語而孔帖  
復云后造造暑宮抑又誤

名義考五鳳樓梁太祖即位羅紹威取魏良材建周翰  
所謂去地百丈在天半空五鳳翹翼者也

困學紀聞寧宗閣名寶章至和二年五臺山真容院太  
宗御書閣已曰寶章矣

後山叢談澄心堂南唐烈祖節度金陵之宴居也世以

為元宗書殿誤矣趙內翰彥若家有澄心堂書目三千餘卷有建業文房之印後有主者皆牙校也

委巷叢談紹興四年大享明堂更修射殿以為享所其基即錢王時握髮殿吳人語訛乃云惡發殿謂錢王怒時即乘此座也

留青日札京師禁中之瓊花島梳粧臺皆金之故物也臺今訛為蕭太后梳粧樓本金燕山故都城之東北隅入元改為萬歲山今在禁中西南

彈雅高皇帝定鼎金陵勝國工部尚書以營造法式進  
上不納按此書圖志有天宮樓閣瓦上作小屋數十楹  
初不知何意及讀古詩云西北有高樓上與浮雲齊交  
疏結綺牕阿閣三重階上有絃歌聲音響一何悲方解  
前圖乃阿閣以棲樂工者欲令八音如天樂從空中來  
耳今惟樓船之鼓棚似之秦人建宮殿謂之阿房城上  
營衛室謂之阿鋪皆取名于此

藝林彙考棟宇篇卷一